


Semmo partii da l'archivio de papê ch'o l'anava misso in sciô *computer*. O Gianni Mazzarello o s'è fæto dâ 'na man da-o sòccio Aldo Bruschi ch'o l'à inandiò un feuggio eletrònico utile, prezenpio, pe stanpâ i indirissi pe mandâ o Boletin, spece da quande o vegio indirisaio de metallo (che gh'emmo ancon in Sede!) o l'è anæto in penscion. Ma se se veu acapîghe de ciù e megio bezeugnava trasferî i dæti in sce 'n *database*. Pe questo, tramite l'Ezio Baglini, emmo posciuo contâ in sciâ colaboraçion do sòccio Fabio Lottero ch'o l'à dæto dôtræ bon-

e idee e òua se peu travagiâ in sce l'archivio senza tanti problemi. Coscì, a-a fin da fœa, graçie a l'inpegno de tutti liatri, òua gh'emmo a posciblitæ de savei quarcôsa de ciù in scî sòcci e de fâ de statistiche ascì.

E l'è pròpio quello che ò fæto pe poei prezentâ a tutti quelli che rîceivan o Boletin in quadro de comme a l'è formâ anheu a Compagna. Un primmo dæto inportante o l'è quello de savei a distribuçion di sòcci in relaçion a l'etæ. Basta aloa "interogâ" o *database* pe avei a risposta.



Pe fâ quèsto, ò pensòu de dividde e dæte da nascita in decadi (quarantenni, çinquantenni, ...) che son quelle riportæ inte l'asse orizzontale da figua de dato. Comme se vedde gh'emmo doî sòcci con ciù de çent'anni e sei nasciui tra o 2000 e o 2010: o ciù zoeno, l'Andrea Rapallo, o l'è nasciuo l'8 de novembre do 2010. I ciù tanti son i setantenni; quæxi pægi i òtantenni e i sciusciantenni; gh'è in bon numero de çinquantenni; ma quelli che gh'ân quanrant'anni ò de meno no son goæi. Demoghe sotta aloa pe fâ iscrive di zoeni senza scordâse che, pe un sodaliçio comme o nòstro, zoeno veu dí ese in scî quarant'anni. L'atro dæto interessante o l'è quello de savei comme

van e iscrizioin (figua "Neuvi sòcci"). Partindo da-o 1990, saiva a dí vintun anni fa, se vedde che scinna a-a 2008 a media a l'ea in scê 15 neuve iscrizioin a l'anno. Me fa piaxeì notâ che da quande gh'è in càrega questo consolato gh'è stæto 'n picco inportante: do 2009 i neuvi iscritti son stæti 79, do 2010 son stæti 61, e a frevâ do 2011 za 16 e emmo ancon da mette i urtimi (ciù ò meno 'na vintenn-a).

Sti dæti chi fan cresce in mi, e creddo in tutti niatri, a speranza de poei vegnî ciù de mille, e pöi ciù de doîmilla çercando de rasonze i vintiquinze milla ch'emo a-a meitæ di anni Vinti do secolo pasòu. Alegri (che n'emmo ben raxon)!

